

SURAT PAULOS TE SEMARU KE

TIMUTIOS

PENULAU BECAKAP

Timutios to' urang Kristen te age' biyak de Asia met, ya jadi kawan Paulos aba' manto' kreja Paulos. Apai ya sida' Yunani aba' inai ya sida' Yahudi.

Alam surat Paulos te semaru ke Timutios, depadah adai tiga utai te penteng. Semaru, ngingat ke Timutios adai mayoh pengajar te salah alam jemat. Kebala pengajar nya' pengajar Yahudi udah bekamoh aba' pengajar te ukai Yahudi te udah deajar de alam jemat. Pengajar sida' madah urang tau' daslamat ente' urang adai pemenau' te kusus, aba' alah patoh ke prator te kebukai. Cuntoh: nitau' belaki bini, nitau' makai utai sebarang te dabre' Tuhan Allah ke kita aba' adai mayoh age' utai te ke bukai. Te kedua, ngingat ke Timutios kati mileh urang te mimpem jemat aba' upa kati urang te tau' mimpem jemat. Te ketiga, Timutios deajar kati ya tau' jadi playan Tuhan te bayek aba' tangong jawab ya ke ngenap urang te jadi jemat.

Tabé' ke Timutios

1 Surat to' ari ku Paulos ke Timutios te bamat-amat upa anak ku kedire' nema tua seiman. Ku bradua ke Tuhan Allah aba' Isa Al Maseh Tuhan kita, nganya' pemayek ati Ya, pengaseh aba' mre' idop penoh damai ke meh. Ku jadi rasol Isa Al Maseh nema daprintah Tuhan Allah Penyelamat kita, aba' Isa Al Maseh pengagam kita.

Paulos ngingat ke Timutios tentang pengajar te nesat

³Pas ku ke wilayah Makedonia, ku bamat-amat minta' isa' meh diyau de Episos, nema diya' adai dua tiga iko' urang ngajar te salah, aba' ku ka' meh ngingat sida' isa' sida' bado'. ⁴Padah ke sida' isa' sida' nadai mames

ari sida' ngajar kebala kisah te bula' aba' isa' sida' nadai ngajar tuson pureh puyang jagang te nise' pemado'. Kebala pengajar nya' bayah nimol pelaya' aba' nyuroh urang nitau' bada' ente' urang daslamat Tuhan Allah pro' uleh iman ja'. ⁵ Maksud te dasuroh ku to' isa' urang kaseh ke pangan ngau kaseh te timol ari ati te tulos, ati nurani te breseh aba' bamat-amat pecaya' ke Al Maseh. ⁶ Uleh adai keda' urang nadai idop upa nya' age', nya' nyuroh sida' mames ari sida' ngajar utai te nise' reti. ⁷ Sida' ka' jadi guru te tau' ngajar Prator Tuhan Allah te datules Musa, amat mah sida' miker sida' tau' bada' tentang kebala utai nya', uleh sida' nadai nyarok ke apa te deajar sida' ke urang bukai. ⁸ Kita tau' bada' Prator Musa bayek ente' ngau pengena'. ⁹ Kita alah ingat Prator Musa nya' ngau ngator idop urang te nadai patoh ke Tuhan Allah, ngau kebala urang te ngelawan Tuhan Allah, ngau urang te dusa, ngau urang te ngai nyemah Tuhan Allah, ngau kebala urang te nadai hormat ke Tuhan Allah aba' agama, ngau kebala urang te munoh apai inai dire' aba' munoh urang, bukai ngau urang te kena' de mua Tuhan Allah. ¹⁰ Prator nya' ga' ngau kebala urang te kanyi, ngau urang laki te ka' ke sama dire' laki, ngau kebala urang te nyual ensia ngau jadi ulon, ngau urang te gah ngemula', ngau urang te madah utai te bula' tentang urang de teban jalai urang besidang, aba' ngau uga' urang te mulah utai te ngelawan pengajar te kena'. ¹¹ Pengajar te kena' nya' pengajar te nuna' Brita Bayek ari Tuhan Allah te Ma Besai aba' patot dapuji. Ku dapecaya' Tuhan Allah nusoi Brita nya' ke urang bukai.

Ngucap syukor ke Tuhan Allah

¹² Ku besukor ke Isa Al Maseh, Tuhan kita te nguat ku sengabot. Nema Ya ngangap ku setia aba' ngangap ku tau' dapecaya' ngau ngelayan Ya. ¹³ Meliya' teh ku urang te mlicak Isa, mrisa urang te pecaya' ke Ya aba' ku urang te ganas, uleh Isa Al Maseh nganya' pengaseh Ya ke ku, tangan nya' ku bedau pecaya' ke Ya, nya' nyuroh ku nitau' bada' apa te ku puluh ke nya' salah. ¹⁴ Tuhan kita nise' pemado' nganya' pemayek ati Ya ke ku. Ya ga' te nyuroh ku tau' pecaya' ke Ya aba' kaseh ke urang bukai. Utai nya' tau' piya' nema kita nrima' Isa Al Maseh aba' sute' aba' Ya. ¹⁵ Apa te ku padah ke to' bamat mah aba' patot datrima' uga': Isa Al Maseh datai ke dunia to' nyelamat urang te dusa, aba' daentara urang te dusa, ku te paleng mayoh dusa. ¹⁶ Uleh Tuhan Allah nganya' pengaseh Ya ke ku urang te paleng mayoh dusa isa' Isa nganya' penyabar Ya ke ku. Ya mulah piya'

ke ku ngau cuntoh ke urang bukai isa' urang pecaya' ke Ya nema nya' mah te nyuroh urang tau' jong idop aba' Tuhan Allah. ¹⁷Tuhan Allah Raja te jong mrintah, patot dahormat aba' dapuji sengabot, nema Ya mah te jong idop, te nadai peda' aba' siko'-iko' Allah. Amen.

Tugas Timutios

¹⁸Timutios anak ku, tugas to' ku pecaya' ke meh nuna' te udah depadah kebala pemipen jemat tentang meh ari Tuhan Allah sebedau meh na' blaboh melayan. Ku ngingat to' ke meh isa' apa te udah depadah tentang meh ari Tuhan Allah ngansak meh bejuang ngau cara te bayek. Cara meh bejuang meh pecaya' ke utai te kena' aba' ngau ati nurani te suci. ¹⁹Adai urang te nadai iboh ke apa te jako' ati nurani, nya' nyuroh sida' nadai pecaya' ke Al Maseh age'. ²⁰Dua iko' urang te upa nya' Himenios aba' Aleksander, sniko' udah ku serah ke Ibles Kepala' bala sitan isa' sniko' tau' jera' mlicak Tuhan Allah.

Pradua urang pecaya'

2 Timutios, te paleng penteng ku minta' isa' meh bradua ke uga' urang. Pinta' ke Tuhan Allah isa' Ya nyukop te daperlu sida'. Aba' besukor ke sida'. ²Meh alah bradua ke kebala raja aba' sida' te mrintah, isa' kita tau' idop tenang aba' damai, aba' isa' kita idop nuna' kedeka' Tuhan Allah aba' cara idop kita patut dahormat urang. ³Nya' mah te bayek te nyuroh ati Tuhan Allah gaga, Penyelamat kita. ⁴Ya ka' isa' uga' urang daslamat aba' tau' bada' pengajar te kena' tentang Isa Al Maseh. ⁵Nema pro' siko' mah Allah aba' pro' siko' mah penengah Tuhan Allah aba' ensia. Penengah nya' Isa Al Maseh te jadi ensia. ⁶Ya te udah nyerah dire' ngelepas uga' urang ari dusa sida'. Ngau cara nya' Tuhan Allah nunyok de senta te pas ente' Ya ka' nyelamat uga' urang. ⁷Nya' mah te nyuroh Tuhan Allah mileh ku jadi rasol Ya ngau madah Brita Bayek ke bansa te bukai Yahudi aba' ngajar pengajar te kena' tentang Isa ke sida'. Apa te ku padah ke to' amat mah! Nadai ku bula'.

Gaya urang laki aba' urang ino' bradua alam jemat

⁸Keba' nya' ku ka' isa' dini ja' urang laki bradua alah ngangkat jari ngau ati te suci, nadai ranseng aba' nise' pelaya' aba' pangan. ⁹Upa piya' ga' kebala urang ino'. Sida' alah belaga' te patot, sederhana aba' bok nang depet, nang ngau mas aba' mutiara, aba' kebala kayen baju te mahal. ¹⁰Uleh sida' alah mulah kebala utai te bayek ke urang bukai, nema nya' te nyuroh sida' bamat-amat panci. ¹¹Urang ino' alah sunye' aba' nrima' apa te deajar ngau patoh. ¹²Ku nadai nyadi kebala urang ino' ngajar aba' mrintah laki, ya alah sunye'. ¹³Nema Adam te semaru dapulah udah nya' baro' Hawa. ¹⁴Aba' ukai Adam te datipu Ibles uleh Hawa, aba' Hawa laboh ke alam dusa. ¹⁵Amat piya' urang ino' tau' daslamat ente' ngadai miyak, puko' ya ngau renah ati alah slareh pecaya' ke Al Maseh aba' slareh ngaseh urang bukai aba' idop kudos ngau Tuhan Allah.

Urang te tau' jadi pemimpen jemat

3 Te jako' ku to' kena' mah, “Urang te ka' jadi pemimpen jemat, urang te ka' bakreja ke kreja te bamat-amat brega.” ²Keba' nya' pemimpen jemat to' alah urang te nise' pejah, alah setia kebini dire', talah ngetat dire' alam brena utai, panai, supan, rumah sida' gah ngau urang bemalam aba' sida' anal ngajar urang, ³ukai penguinom, ukai urang te mangah ranseng, uleh sida' urang te ritak, gaga bedamai, aba' nadai tama' ke duet. ⁴Ya alah panai nguros keluarga ya ngau bayek, aba' ngajar kebala anak ya patoh aba' hormat ke ya. ⁵Ente' urang nitau' mimpen keluarga ya kedire', kati ya tau' mimpen jemat Tuhan Allah? ⁶Nang mileh urang te baro' pecaya' jadi pemimpen jemat nema mali ya sumong aba' daukom Tuhan Allah upa Ibles. ⁷Urang te jadi pemimpen alah deklala bayek demua urang te nadai pecaya', isa' Ibles nadai ngelaboh ya ngau kebala cakap urang te mejai' ya.

3:2, 12 *setia kebini dire'* Alam tek seli tau' ga' breti: pemimpen jemat nitau' bebini lebeh ari siko'.

Playan jemat

⁸Kebala playan jemat alah urang te dahormat kebala urang. Ukai te mangah mejai' urang, ukai penguinom, aba' ukai urang te tama' ke duet. ⁹Sida' alah bepegai ke pengajar te kena' te udah Tuhan Allah anyu' ke kita, aba' sida' alah idop ngau ati nurani te suci. ¹⁰Sida' alah dacuba dulau, ente' sida' nise' pejah, baro' sida' tau' deangkat ngau playan. ¹¹Upa piya' ga' kebala bini playan jemat alah urang te dahormat kebala urang. Sida' ukai urang te mangah mejai' urang bukai, tau' ngetat dire', aba' tau' dapecaya' alam brena utai. ¹²Playan jemat alah setia ke bini dire'. Sida' alah panai nguros kebala anak sida' aba' keluarga ngau bayek. ¹³Sida' te ngelayan ngau bayek ka' empala dahormat urang bukai, aba' nya' nyuroh sida' empala brani nusoi ke urang bukai ente' sida' pecaya' Isa Al Maseh.

Brita Bayek te depadah ke kita

¹⁴Ku ngagam nadai lama' age' lah ku ngunyong meh. Uleh amat piya', matang mah ku nules surat to' ke meh, ¹⁵isa' ente' ku lat datai lah, ari surat to' meh ka' tau' bada' kati kita alah idop jadi keluarga Tuhan Allah. Te demaksot keluarga Tuhan Allah nya' mah kesatuan uga' jemat empu Tuhan Allah te idop. Jemat to' mah te jadi dasar aba' tiang te ngetan aba' te negoh pengajar te kena' ari Tuhan Allah. ¹⁶Nitau' desangkal age' lampar besai pengajar te udah deanya' Tuhan Allah ke kita:

Al Maseh jadi ensia,
 Roh Kudos nganya' ente' Al Maseh bamat mah Anak Tuhan Allah,
 dapeda' kebala mlikat,
 datusoi de kebala bansa,
 dapecaya' kebala urang de dunia to',
 deangkat ke sruga.

Tugas Timutios ngadap kebala urang te ngajar tesat

4 Roh Kudos tegas madah de waktu te kemua lah, urang nadai age' pecaya' ke te deajar Al Maseh sida' patoh ke roh te nesat urang aba' pengajar kebala sitan. ²Pengajar nya' datusoi kebala urang te mangah ngemula' te budi-budi bayek. Ati nurani sida' nyau ngematu nya' ngasoh sida' nitau' mileh te dapulah sida' kena' ke salah. ³Sida' ngerot urang belaki

bini, ngerot urang makai te dapulah Tuhan Allah. Bata' Tuhan Allah mulah pemakai nya' isa' datrima' kebala urang pecaya' te tau' bada' pengajar te kena', ngau sukor ke Tuhan Allah. ⁴Uga' te dapulah Tuhan Allah nya' bayek nise' te najes ente' datrima' ngau besukor ke Tuhan Allah. ⁵Uga' nya' dabreseh uleh pesau ari Tuhan Allah aba' uleh pradua. ⁶Ente' meh slareh ngingat pengajar nya' ke kebala menyade' kita, meh jadi playan Al Maseh te bayek. Bluma' meh ngajar uga' nya' meh alah mekal dire' ngau pesau Tuhan Allah aba' pengajar te kena' te meh tuna' slama' to'. ⁷Nang mames ari meh ngau ninga kebala kisah te dapulah-pulah. Uleh meh alah ngelateh dire' belajar idop nuna' kedeka' Tuhan Allah. ⁸Lateh jasmani nadai mayoh guna, uleh ngelateh dire' belajar idop nuna' kedeka' Tuhan Allah to' beguna alam uga' utai nema adai danyi ngau idop ento' aba' ngau idop te ka' datai jemah lah. ⁹Apa te udah ku padah to' amat mah aba' tau' dapecaya'. ¹⁰Keba' nya' kita mati-mati kreja aba' bejuang nema kita pecaya' ke Tuhan Allah te idop. Penyelamat uga' ensia, kusus urang te udah pecaya' ke Ya.

¹¹Padah aba' ajar ke uga' nya'. ¹²Nang sampai adai urang te menadai meh tegal meh age' biyak. Meh alah jadi cuntoh ngau kebala urang te pecaya' bayek alam cakap meh, bayek tingkah laku meh, bayek kaseh meh, bayek iman meh aba' idop meh te suci. ¹³Sebedau ku datai, meh alah rajen maca aba' ngajar Kitab Suci ke jemat, aba' rajen ngansak sida'. ¹⁴Nang lemau ngau krunia te dabre' Roh Kudus ke meh, jalai kebala pemimpen jemat madah apa te ka' tejadi tentang meh ari Tuhan Allah, pas sida' bradua aba' ngletak jari ke atau meh. ¹⁵Pulah kah bamat-amat uga' kebala utai te udah dasuroh ke meh isa' urang meda' meh nyau empala anal ngau krunia te dabre' ke meh. ¹⁶Jaga kah dire' meh aba' jaga apa te meh ajar kah, nema ngau cara nya' meh aba' uga' urang te ninga meh tau' daslamat ari ukom Tuhan Allah.

Cara mimpen jemat

5 Nang kasar ngano' kebala urang laki te tuwai, padah ke sida' upa meda' meh madah apai dire'. Rara ke kebala miyak laki te biyak ari meh upa ngerara menyade' dire'. ²Bayek-bayek ke meh aba' urang ino' te tuwai upa meda' meh aba' inai dire'. Aba' bayek-bayek ke meh aba' urang ino' te biyak ari meh upa meda' aba' menyade' dire' ngau tulos ati.

Cara jemat mrati kebala ino' te balu

³Prati ke ino' balu te diyau kedire'. ⁴Uleh ente' balu nya' age' adai anak aba' uco', kebala anak uco' ya alah belajar dulau ngelayan Tuhan Allah ngintu inai dire' aba' malas budi urang tuwai aba' ine' sida', nema nya' te mulah ati Tuhan Allah gaga. ⁵Ino' balu te ngidop dire', sida' ngagam Tuhan Allah aba' bradua sengabot betawas malam. ⁶Uleh kebala balu te gaga muas dire', ya nyau mati rohani amat ya age' idop. ⁷Kingat ke kebala utai nya' ke uga' jemat isa' sida' nise' pejah. ⁸Uleh ente' adai urang te ngai ngintu kebala manal menyade' dire' apa klage' ise' bilek dire', ya nadai patoh ke pengajar te kena' aba' ya lebeh jat ari urang te nadai pecaya'.

⁹Sida' te masok daptar klumpok balu te tau' debanto', to' pro' sida' te enam puloh taon ke atau, te baro' skale' belaki. ¹⁰Aba' sida' udah deklala mulah te bayek, upa meda' ngintu miyak dire', rumah ya gah jalai urang bemalam, ngelayan kebala menyade' seiman, nalau urang te idop pedeh, slareh siap mulah te bayek. ¹¹Nang naptar kebala balu te age' biyak ke klumpok balu, nema ente' sida' nadai tan aba' ka' belaki age', sida' kelupa ke danyi dire' ente' sida' ka' ngelayan Al Maseh ja'. ¹²Ente' sida' belaki age' ukom ka' datai ke sida' nema sida' nadai setia ke danyi dire' te semaru. ¹³Bukai ari nya', kebala balu te age' biyak mames ari sida' ngau branau kiya'-kito'. Sida' luntos klalah aba' gah mejai' urang aba' kalot ke urang bukai. Sida' gah becakap ke utai te nadai patot decakap. ¹⁴Keba' nya' ku ka' isa' kebala balu te age' biyak belaki age', sida' beranak, nguros keluarga dire' ngau bayek, isa' kebala urang te areh ke kita nitau' mejai' kita. ¹⁵Ku madah pito' nema adai dua tiga iko' balu te tesat aba' sida' idop nuna' kedeka' Ibles Kepala' bala sitan. ¹⁶Ente' kita' urang te udah pecaya' ke Isa adai keluarga te balu, kita' alah manto' sida' isa' sida' nadai jadi beban jemat. Aba' isa' jemat tau' manto' sida' te bamat-amat balu.

Kebala petunyok te kebukai

¹⁷Kebala pemimpen jemat te bekreja ngau bayek alah dahormat, aba' dabre' upah te patot, apa klage' sida' te kusus kotbah aba' ngajar. ¹⁸Sida' patot dehormat, nema adai depadah alam Kitab Suci upa pito', “Nang kita' namet nyawa sapi te tangan ngirek ganom,”* aba' “Urang te kreja

* 5:18 Ul. 25:4

patot nrima' upah.”* ¹⁹Adu meh ninga kebala te datudoh urang ke kebala pemipen jemat, kecuali ente' adai dua tiga iko' urang ka' ngau saksi.* ²⁰Kebala pemipen jemat te mulah dusa alah derara de mua jemat, isa' kebala jemat te kebukai takot. ²¹De mua Tuhan Allah aba' Isa Al Maseh aba' kebala mlikat te dapileh Ya, ku nyuroh meh isa' meh nuna' kebala petunyok te baro' ku padah ke meh. Aba' puluh ke uga' to' ngau uga' jemat nang nyemeh mipih urang. ²²Nang beburoh gila' ka' ngletak jari bradua ngelantek sida' jadi pemipen jemat. Nema asa meh beburoh ngelantek sida', ente' urang nya' mulah dusa meh lah te desalah. Keba' meh alah nyaga idop meh isa' meh idop kudos. ²³Timutios, nang meh pro' nginom ai' mati gena, inom ke ga' ai' angor siket ngau entama perot meh te gah pedeh. ²⁴Adai dusa dua tiga iko' urang, lama' nyau deketau' sebedau sida' dapresa. Uleh adai ga' dusa te pedeh daketau', nyau klama' baro' mah daketau'. ²⁵Upa piya' ga' kebala utai te bayek te dapulah urang. Adai te sintak peda', adai ga' te nadai sintak peda', uleh apa te udah dapulah sida' nadai talah tapok sengabot.

6 Kebala kita' te jadi ulon alah ngrega ke tuan kita', isa' urang nitau' mejai' nama Tuhan Allah aba' pengajar Ya. ^{2a}Kebala ulon te empu tuan te udah pecaya' ke Al Maseh, nitau' menadai tuan sida' tegal sute' iman aba' sida'. Empala sida' alah ngelayan tuan sida' lebeh bayek age', nema te nrima' untong ari te sida' kreja ke nya' tuan sida' te sida' kaseh.

Pengajar te tesat aba' sikap urang te tama' ke duet

^{2b}Ajar ke uga' utai to' aba' suroh ke ngenap urang mulah uga' to'. ³Ente' adai urang bukai ngajar laen ari te ku ajar aba' nadai setuju ke pengajar te kena' ari Tuhan kita Isa Al Maseh, aba' ngai nuna' pengajar te ngemai' kita idop nuna' kedeka' Tuhan Allah, ⁴sida' urang te sumong, bata' nise' pemenau' sida'! Penyakit sida' gaga betengek aba' blaya' tentang reti asal usol kata. Nya' ngasoh urang iri ati, blaya', mejai' urang bukai, curiga ke urang bukai, ⁵aba' betengek nise' pemado'. Pemiker kebala sida' nya' nyau buntu aba' nise' te kena'. Sida' miker ente' acara agama tau' ngasoh sida' kaya. ⁶Amat mah, acara agama to' tau' ngasoh kita boleh untong rohani te besai ente' kita puas ngau apa te adai. ⁷Kita nise' ngemai' utai ke dunia to' jalai kita adai, piya' ga' kita nise' ngemai' utai pas kita mati. ⁸Nya'

* 5:18 Luk. 10:7 * 5:19 Ul. 19:15

nyuroh kita alah puas ente' adai te depakai aba' te dengau. ⁹ Kebala urang te ka' kaya, laboh ke brena utai te ka' encuba sida'. Sida' detamet uleh kebala peneka' te budu aba' medeh dire'. Uga' nya' nyuroh sida' ancor aba' rusak. ¹⁰ Nema gara-gara tama' ke duet to' urang ka' mulah brena utai te jat. Aba' tegal ka' kaya mayoh urang te nyimpang ari pengajar Isa Al Maseh. Nya' nyuroh sida' ma tusah ati.

Pesau pemado'

¹¹ Uleh meh Timutios, meh urang te daempu Tuhan Allah. Meh alah brusaha nang sampai mulah te jat upa piya'. Uleh meh alah brusaha mulah te dakedeka' Tuhan Allah aba' idop ngau cara te degaga Ya. Meh alah betamah pecaya' ke Al Maseh, kaseh ke urang bukai, tan ngadap brena utai te pedeh, aba' alah ritak aba' urang bukai. ¹² Bejuang bamat-amat ke meh idop nuna' pengajar te kena' ari Al Maseh, aba' meh alah brusaha isa' jong idop aba' Tuhan Allah. Tuhan Allah ngumai meh isa' meh jong idop aba' Ya. Pas tangan nya' meh ngako' de mua urang banyau ente' meh pecaya' ke Al Maseh. ¹³ Dinga kah, ku mre' printah to' ke meh de mua Tuhan Allah te mre' idop ke uga' utai aba' Isa Al Maseh te udah madah pengena' dire' de mua Puntios Platos: ¹⁴ Meh alah nuna' uga' utai te udah depadah ke meh ngau ati te suci isa' urang nitau' mejah meh, datai ke senta Tuhan kita Isa Al Maseh datai age'. ¹⁵ Penatai Ya nya' lama' udah deatoh Tuhan Allah kedire', nema Ya mah siko'-iko' te bekuasa te patot dapuji, Raja te paleng tinge', Tuhan te paleng tinge'. ¹⁶ Pro' Ya mah te idop sengabot. Ya idop alam trang nya' te nyuroh urang nitau' nunga' Ya. Nise' urang te udah meda' Ya, aba' nise' urang te tau' meda' Ya. Tuhan Allah te patot dahormat aba' dapuji nema ya bekuasa belama-lama! Amen.

¹⁷ Timutios kingat ke kebala urang te kaya de dunia to' isa' sida' nadai sumong aba' isa' sida' nadai nganal kebala reta te nadai pesti de idop to'. Uleh sida' alah pecaya' Tuhan Allah te mre' uga' utai blebeh-lebeh ke kita ngau kita asa kah ¹⁸ Kingat ke sida' isa' sida' slareh ka' nalau urang, sida' kaya ka' mulah brena utai te bayek, mangah mre' aba' bebagi. ¹⁹ Ente' sida' mulah piya' sida' ngumpol reta ngau mudal idop jemah lah. Ngau cara nya' sida' tau' ngasa idop te pengamat.

²⁰ Timutios apa te udah dapecaya' ke meh pulah ke nya' bamat-amat. Nang ninga kebala urang te gila becakap ke utai te nise' reti te ngelawan Tuhan Allah. Sida' ngelawan Tuhan Allah ngau pemenau' te deangap sida'

kena'. ²¹Nema adai dua tiga iko' urang te ngajar nya' aba' ngau cara nya' sida' nyimpang ari apa te kita percaya'. Ku bradua isa' Tuhan nganya' pemayek ati ya ke kita'.